

PAGINA DI ANTAÑO



CONHUNTO SUPERIOR

Para d.r.p.d. Harry James; James Warner; Juan Maduro; Prins Maduro; Vicente Ras; Efigenio Kock; John Warner; Eric Butler; Sinta d.r.p.d. Mathew Maduro; Coby Maduro; Frans Lampe; Marco Thiel y Gregorio Ras.



ORQUESTA HAPPY HIT

Para d.r.p.d. Mariana Stamper; Marcelina Werleman; Frida Hodge; Audrey Williams; Jean Dollison; Cobi Maduro; Eric Butler; Edwin Lovel; Roy Brown; Vicente Ras; Edwin Brandon. Sinta d.r.p.d. Joyce James; Fred Muller; Busty Down; Harold Gumbs.



CONHUNTO LOS BIGOTES

Para d.r.p.d. Luis Maduro; Juan Maduro; Jose Stamper; Coby Maduro; Prins Maduro; Elviro Maduro y Wicho Kock.

E intencion di Warero ta pa publica den tur su edicionnan algun paginas di antaño relaciona cu e bario di Brasil, e biaha aki Warero a publica algun grafico di dos conhunto y un orquesta cu a lanta for di den Brasil, pa nos por a haya un relato relaciona cu e grupo musical nan aki, nos a aserca Sr. Coby Maduro kende tabata un integrante di e agrupacion nan aki, y tambe cu algun datos personal.

Segun Cobi a conta nos, Conhunto Superior tabata e prome conhunto musical di Brasil cual a ser funda pa Sr. Eric Butler mas of menos 33 aña pasa tempo cu Cobi tabata un hoben di 14 aña di edad.

Conhunto Superior tabata activo pa un temporada di 8 aña, y mester a termina debi cu varios di e musico nan tabata estranhero y mester a bandona Aruba cu lay-off na Lago, y den e tempo nan ey tabata dificil pa haya un bon trompetista, y pa bo por a competi den e epoca nan ey cu conhunto nan manera Habana Boys: Imperial, bo mester di blaas instrumento pa acompaña bo, y si bo bin un acordeon of cu guitarra bo no ta make it great.

Despues di Superior, Coby a actua como cantante den agrupacion nan musical manera Estrella Antillana: Orquesta Happy hit: (di Brasil) Imperial: y Habana Boys, e conhunto nan aki tabata actua den tur rincon nan di Aruba, e.o. R.C.A: Aruba Jrs. Jamanota: Club Gardena: Golden Rock Club. Despues Coby a dicidi di bini cu su mes un conhunto, cual tabata e popular agrupacion Los Bigotes, y cual conhunto a yega di gana un contest teni entre tur e agrupacion nan musical aki na Aruba, pa esnan cu talbes no sa of a lubida caba, Los Bigotes tabata actua un bez pa siman na Radio Voz di Aruba presenta pa Whiskey Red Hackle, y tur radio oyentes por a goza di nan musica y tambe di e hit nan manera Kakalaka Blanco Nan, Bida ta un placer, Hula Hup, y Ban Cunucu Ban Cunucu Ban Coba Pinda.

Los Bigotes a actua pa 15 aña largo aki na Aruba, y mester a termina pa e motibo cu algun di e musico nan tabata estudiante na Training School di Lago, y tabata dificil pa bo studia y toca alaves. Aparte di Aruba, Cobi a yega di actua den exterior tambe, na 1956 na Cuba cu Senen Suarez, Orlando Vallejo, Tito Guizar den Tropicana Night Club na Havana, den Hatuey Nigh Club (Havana) cu Doras Vegas, y na Radio Progreso (Havana Calle Infante 25) cu Faustina Lopez kende a saka e cantica (Vecina prestame su cubo). Dioris Valledaris (Dominicano) y Francisco (Sonora matancera) tabata e persona nan cu a duna Cobi un push pa e por a actua na Cuba. Na Santo Domingo Cobi a actua cu orquesta di Emilio Suarez, na Costa Rica cu orquesta di Escardon. Na Colombia cu Panchito Gomez den Saratoga Night Club. Na Suriname cu Caribbean Boys hunto cu Juancho Kock y Arnold Beyde.

Algun aña pasa Cobi tabata forma parti di e popular Blue Room Combo cual hopi hende aki na Aruba conoce nan pa nan actuacion den Bamboo Night Club na San Nicolas. E diferencia cu Cobi ta haya awor aki entre e conhunto di antes y esnan di awor ta cu prome tabata tin mas diciplina, ora bo mester a toca un baile e tempo nan ey, bo mester ta mei ora adelanta, pa bo cuminsa exactamente na e ora cu e contract ta stipula. Su comentario ariba cual ta e mihor conhunto actual di Aruba, (Ta tur ta bon, ta abo mester gusta musica).

Un di Cobi su deseo nan ta, pa mira e bario di Brasil bay dilanti, Cobi tin un grupo Folklorico y ta dispuesto pa actua gratis pa cualkier actividad cu Centro di Bario Organiza.

Esaki ta en breve di loke WARERO a haya serca Sr. Coby Maduro pa cu nos pagina di antaño.